

# Dunnas\* rumantschas a la chauma!

■ **Ils 14 da zercladur ans unin nus, faschain chauma a chasa u tar la lavur e giain sin las vias! Nus lain egalitad, uss e dapertut! Sche ti e tias collegas vulais meglierar la situaziun da las dunnas\*, faschai part da la chauma da dunnas\*!**

## **Pertge che nus faschain chauma**

L'equalisaziun n'è anc betg cuntanschida malgrà ch'ella è dapi 1981 francada en la constituziun.

– Nossa paja e noss temp vegn engulà. Nus chattain pli pauc paja per medema lavur. Nossa lavur a chasa na vala betg sco lavur, resta nunvesida e na vegn betg valitada. Las consequenzas: Surchargia, nauscha paja, bassa renta.

– Dunnas\*, che lavuran sin il puresser, na survegnan nagina paja. Senza paja e contract da lavur valan ellas sco persunas senz'activitad da gudogn. Trais quarts dad ellas n'èn betg assicuradas. La pura n'ha nagina protecziun sociala cura ch'ella vegn en speranza. E sch'ella sto bandunar il puresser na po ella betg ir tar il center per intermediaziun da lavur.

– La situaziun vegn mendra. La politica spargna sin noss custs – per exempel tar las expensas publicas per tgira d'uffants, persunas malsaunas ed attempadas. Quai ha effects sin nus dunnas\*: Nus stuain stoppar las largias, saja quai cun lavur gratuita da famiglia u sco emploiada da chasa sut nauschas cundiziuns.

– Ils cunfins che nus tschentain vegnan ignorads e surpassads. Saja quai a chasa, en public, durant nossa scolaziun u a la lavur: Perquai che nus essan dunnas\* sentin nus violenza sexuala e sexistica. La publicitad na prenda betg serius quai e bagatellisescha talas experientschas.

– La situaziun da viver en pitschnas cumanzas e la pitschnadad dal mund rumantsch favurisescha ina controlla sociala e cun quella era veglias estructuras patriarcalas. Controlla sociala protegia bain en tschertas situaziuns, dentant engrevescha ella era progress e modernisaziuns socialas.

## **Nus schain: STOP! I sto ir in grond pass vinavant. Nus faschain chauma! Nus lain reacziuns!**

Ti ta poss participar a fitg differentas modas ils 14 da zercladur: Davent dad interrupziuns e stops da lavur sur chaumas da cuschinar e schubregiar a chasa e pender bandieras e scuas or da las fanestras fin da purtar simbols da la chauma – mintga dunna\* po sa participar. La creativitad n'enconuscha nagins cunfins.

Dus puncts en fix: A las 11.00 mettain nus in signal communabel cun acziuns a las piazzas da lavur. Ed a las 15.30 smettain nus la lavur ed ans entupain a las festas e demonstraziuns regionalas.

## **Demonstraziuns e festas a Cuira**

10–20: Da mangiar, musica e teater sin via sin l'Alexanderplatz

15.30: Cumentament dal marsch da dunnas al Kornplatz

17.00: Ura d'acziun sin l'Alexanderplatz

## **Demonstraziuns e festas a Turitg**

15.00: Tribuna sin il Helvetiaplatz cun concerts e pleds, chantar e festivar comunablamain

17.00: Demonstraziun dal Platzspitz al Helvetiaplatz

19.00: Concerts e pleds, rapports dad acziuns da chauma sin il Helvetiaplatz

Ultra da quai datti in chat da WhatsApp, al qual mintga dunna\* rumantscha è bainvegnida da sa participar, l'uschenumnada «rait da Rumantschas\*». L'idea da quella gruppa è da sustegnair, promover e trair fils tranter dunnas\* rumantschas.

Qua san ins parter cuntegn, saja quai litterars, profans, socials, musicals u privats. I va simplamain per networking! Ed era qua vegni discutà davart la chauma – uschia datti per exempel ina gruppa da dunnas\* che va comunablamain a la chauma.

Sche ti vul far part da quella gruppa ta s'annunzia tar la GiuRu per survegnir in contact che porscha a ti l'access al chat. El è liber per dunnas\* da mintga vegliadetgna.

## **En cuminanza essan nus fermas!**

**Forza a las femnas\*!**



Il logo da las dunnas\* rumantschas.